



## SAOPŠTENJE ZA MEDIJE

### Prijedlog Centra za sigurnosne studije

#### **Evropske zakone usvojiti prvo u Domu naroda Parlamentarne skupštine BiH pa tek onda u Predstavničkom domu**

Sarajevo, 18.08.2023.

Neumitno se približava 22. avgust za kada je zakazana sjednica Predstavničkog doma PS BiH na kojoj bi se trebala usvojiti neka od zakonodavnih rješenja vezanih za ispunjavanje zadatih prioriteta iz Mišljenja Evropske komisije. Političari iz struktura vlasti šalju poprilično šture, ali i optimistične najave da bi se mogla usvojiti neka od normativnih rješenja koja bi iskazala opredjeljenost postojeće koalicije na državnom nivou na ispunjavanje evropske agende.

Na marginama aktuelnih i trenutno burnih dešavanja u Bosni i Hercegovini, možemo vidjeti i užurbane aktivnosti predstavnika Delegacije Evropske unije u BiH koja nastoji isposlovati politički koncenzus oko usvajanja zakona koji su po nekima ključni za predstojeći pozitivan izvještaj EK o napretku BiH na njenom evropskom putu. Na drugoj strani, suočeni smo i sa sve glasnijim oponentima iz civilnog društva, ali i nekih opozicionih stranaka da se ne usvajanju polovična zakonska rješenja, odnosno zakoni koji nisu u potpunosti usklađeni sa evropskim aquis, tj. pravnom stečevinom EU.

Dogovorena je i sjednica Vijeća ministara BiH, koja bi neposredno prije sjednice Predstavničkog doma trebala dostaviti i određene tačke za razmatranje, u prvom redu imenovanje ministra finansija i trezora BiH, koje je Dodikova stranka postavila kao uslov za usvajanje evropskih zakona. Međutim, najnovijom objavom, sjednica Vijeća ministara je zakazana za 23. avgust, odnosno dan nakon održavanja sjednice Predstavničkog doma.

Biće zanimljivo vidjeti da li je postignut politički dogovor po kojem su vladajuće stranke iz Republike Srpske odustale od svog deklarisanog uslova i dali saglasnost za evropske zakone ili će svoje uslovljavanje prenijeti na nivo Doma naroda u kojem posjeduju apsolutnu dominaciju. Sve ovo lidere Trojke stavlja u veoma nezavidnu poziciju imajući u vidu perfidnu igru kojom su predstavnici SNSD i HDZ licemjerno izigrali svoje partnere prilikom usvajanja budžeta i dogovorenog prijedloga za smanjenja plata imenovanim licima u institucijama BiH, prethodno dogovorenim i usvojenim u Predstavničkom domu.

Stoga, predlažemo da se Trojka dodatno osigura u prohodnost evropskih zakona, te prije upućivanja u proceduru Vijeća ministara prijedloga imenovanja nedostajućeg ministra iz RS-a i njegovog potvrđivanja u Predstavničkom domu, iskoristi proceduralne odredbe kojim bi se

uvjerile u dobronamjernost svojih partnera u vlasti. Naime, zakonodavna procedura predviđa da na prijedlog Kolegija Doma naroda, zakone i druge akte može prvo razmatrati i Dom naroda ili se zakonodavna procedura može odvijati i uporedo u dva Doma.

dr. sc. Denis Hadžović  
predsjednik Centra za sigurnosne studije

